

# 1 NWER NYI JON

## *Alum nya elkpin*

<sup>1</sup> E kp'nyono Alum nya elkpin tv-n, nyao nya jolo go mboma mbomo, nya e ma wuk, fere nyehn go egahre amahr. Wahr ebnyehn, fere kooro go egahre abo.\*

<sup>2</sup> Elkpin nio eblohng ba, wahr ebnyehn. Owo wahng ka e kp'yiimi ntianse, jo tong-n bade elkpin ni li go njinanjini, ni jolo a Nsoo, ma fere lohng ba, e ma nyehn.

<sup>3</sup> Nyao nya e ma nyehn, fere wuk, nyanehm o nya e kp'tob tong-n fvfo, eji n l'bel elkoono a nahre, elkoono nio ni e kpi no a Esowo abola Jisos Kraist Mmon ewe.

<sup>4</sup> E kp'nyono ana tv-n, eji eyebatahng ejahre l'sahb gb'gbal.†

## *Esowo ellennge ni*

<sup>5</sup> Etib bi ana bi e wuku goji Mmon ewe, bi bi e kp-n tiingi re, Esowo ellennge ni. Go ege, ejanng e ajehng ajehng limm.‡

<sup>6</sup> E l'tong re, e li go elkoono a Esowo, fere jo jen go ejanng e, wahr ebkim efahng e. Elkpin enahre lohkem li go etingitingi.

<sup>7</sup> E l'jen go ellennge, ana yefono antahng li go ellennge, e kpi elkoono atemtem. Alung ma Jisos

---

\* 1:1 1:1 Jon 1:1,14 † 1:4 1:4 Jon 15:11 ‡ 1:5 1:5 Jems 1:17

Mmon ewe bahke jo ru ntim abiafem enyahre kpee.§

<sup>8</sup> E l'tong re, abiafem anyehng anyehng e kpimm, e kpi elnahre nehm. Etingitingi go egahre atahng wobem.

<sup>9</sup> E l'fvrvv abiafem enyahre, ye li nkakesehk a nne no li go etingitingi, á bahke tahme ka-r go egahre abiafem, fere ru ntim enyahre, laade ab'bi kpee.

<sup>10</sup> E l'tong re, wahr abiafem e ka lim a lim, lohngo re, wahr ebrod Esowo bum ana nkimfahnga nne.\* Alum enye go egahre atahng wobem.

## 2

### *Kraist wo li nkakebo ewahre*

<sup>1</sup> Abon ebame, n kp'nyono ana tv-n re wahn k'lim abiafem. Nne awohng awohng ewahre no l'fere lim abiafem, Jisos Kraist ji nne no nno bahke gboongo Nsoo ka-e.\*

<sup>2</sup> Tibre Jisos wo gongo Esowo ka-r tib go egahre abiafem, abiafem nyanyahre nya nya sang, tob li ka abiafem nya njini kpee.†

<sup>3</sup> E l'bum atahm nya Jisos, owo e bahke sahb k'kahn re, e kp-e lohko kahn.

<sup>4</sup> Nne no l'tong re, “N kp-e kahne,” k'fere bum atahm enye, ye nkimfahnga nne wo. Etingitingi go ege atahng wobem.

<sup>5</sup> Nne awohng awohng no l'bum alum enye, ye wo, elkoro ni Esowo kp-e koro ma biingi go

---

§ 1:7 1:7 Hib 9:14; Ell 1:5 \* 1:10 1:10 Rom 3:10; Jems 3:2 \* 2:1 2:1 Rom 8:34; Hib 7:25 † 2:2 2:2 Kol 1:20

nseenge. L'jol ano, e bahke lohko kahn re, e wob-e go atahng.‡

<sup>6</sup> Nne no l'tong re, á li a Jisos, nobo re eljini ene jol ana ni Jisos.

### *Ntahm nyi nfenfe*

<sup>7</sup> Akpondahme enyame, n nehme nyon na ntahm nyi nfenfe tv-n. N kp'nyono nk'kula ntahm tv-n, nyio nyi m bele go mbomannahb. Nk'kula ntahm nyio li ellum ni m ma tohko wuk.§

<sup>8</sup> N kp'kpeke tob nyon ntahm nyi nfenfe fvfo tv-n, nyio nyi li etingitingi jio ji nne bahke ma nyehn goji Jisos, fere nyehn go egahne fvfo. Tibre ejanngge kp'male, etingitingi ellenngge ni ma fere kehme elyake.

<sup>9</sup> Nne no l'tong re, á kp'jene go ellenngge, fere jo ko mmonannyehn ekv, á li nne no kpeke wob go ejanngge.

<sup>10</sup> Nne no mmonannyehn l'kor-e, á li nne no kpi njene njene go ellenngge. Nne noo, ejumjum á kpimm ji bahke limi nne noko gbo yel abiafem.

<sup>11</sup> Nne no l'ko mmonannyehn ekv, á jehk go ejanngge, fere kp'jene go ejanngge. Á kpehme kahn edi ji á fi no. Tibre ejanngge m-e tehm go amahr, á nehme nyehn.

<sup>12</sup> N kp'nyono nwer nyia tv-n, abon ebame, tibre wahn ebbel eltahmeka go egahne abiafem tib go esi mbing nyi Kraist.

<sup>13</sup> N kp'nyono nwer nyia tv-n, babnsoo, tibre n kp'kahne nne no jolo go mbomannahb. N kp'nyono nwer nyia tv-n, ajangkun tibre wahn

---

‡ 2:5 2:5 Jon 14:21,23    § 2:7 2:7 Jon 13:34

ebsehng Ebinne jio. N kp'nyono nwer nyia tv-n, abon ebame,ibre wahn kp'kahne Esowo Nsoo.

<sup>14</sup> N kp'nyono nwer nyia tv-n, babnsoo,ibre wahn kp'kahne nne no jolo go mbomannahb. N kp'nyono nwer nyia tv-n, ajangkun,ibre wahn kp'tahne, alum Esowo nyaa, wob go egahne atahng, wahn ebsehng Ebinne jio.

<sup>15</sup> Nong, njini k'jo kor-n, jol ejum ajehng ajehng ji li go njini. Nne awohng awohng no njini nyia l'kor-e, elgoro ni Nsoo go ege atahng wobem.\*

<sup>16</sup> Ejum ajehng ajehng ji li go njini nyia, ji ane kpo yehke amahr ebo kunu, a ekor nsol ngubjing, go nsol nyi ane kpo geere kak, nyao ona kpee lohngem goji Nsoo, lohng go njini nyia.

<sup>17</sup> Njini nyia bahke male kpee, a ejum ajehng ajehng ji li go njini, ji ane kpo seb re bo bel. Nne no l'lim mbang nyi Esowo, ye wo bahke kpini go njinanjini.

### *Nnekv no Kraist*

<sup>18</sup> Abon ebame, es'kohro ngare nyi ma rehng a. Wahn ebwuk re, Nnekv no Kraist bahke bake. Jol anv, anebekv ba Kraist ebba gbalee.† Owo wahng e ma lohko kahn re, es'kohro ngare nyi ma rehng a.

<sup>19</sup> Ane bao lohngo go egahre ellong,ibre bo jolo ane ba woomo go egahre ellong go nnyo a nnyo, jol ntim ebo, go egahre woomem. Li re bo lohko woomo go egahre ellong a ntim a ntim ebo, kehn bo jol soro asi a nahre. Wo anv, boblohng,

---

\* **2:15 2:15** Jems 4:4; Rom 12:2    † **2:18 2:18** Mat 24:5,24

eji l'lohko tib re, bo ane kpee lohkem woomo go egahre ellong.‡

<sup>20</sup> Wahn ba li ane ba Esowo ma yaange Etingi Etohko wohng-n, owo wahnge n kp'kahne ejum ajehng ajehng.

<sup>21</sup> N kp'nyono nwer nyia tv-n, lohngem re wahn, etingitingi n nehme kahn, n kp'kahne. Fvfo, n kp'tob kahn re, efahnge ajehng ajehng limm, ji kpo lohng go etingitingi.

<sup>22</sup> Nne awo li Nkimfahnga nne noo? Nne no kil eltaame re, Jisos wo li Kraist, fere ten Nsoo, a Mmon, ye wo li Nnekv no Kraist.Š

<sup>23</sup> Nne no l'ten Mmon, yebtob ten Nsoo. Nne no l'taame tv Mmon, Nsoo wob-e go atahng.\*

<sup>24</sup> Nong, alum nya n wuku go mbomannahb jol go egahne atahng. Nyao nya n wuku go mbomannahb l'fere woomo go egahne atahng, n bahke jolo ajehng a Nsoo, fere jol ajehng a Jisos Mmon ewe.

<sup>25</sup> Elkpin ni li go njinanjini ni, Jisos nyame re a bahk-r kake.

<sup>26</sup> N kp'nyono nwer nyia tv-n, tib ane bao ba kp'gare re bo nehm-n.

<sup>27</sup> Tibre Etingi Etohko ji Esowo ma yaange wohng-n jia a nahne. N nehme kpe seb nne awohng awohng no bahk-n tibi. Etingi Etohko kpo tib-n ejum ajehng ajehng. Nsol nyi a kpo tib-n lohko li go etingitingi, afahnge sang. Jo bumen eltibi nio ni Etingi Etohko kp-n tibi, wahn sa ano a Kraist.†

---

‡ 2:19 2:19 Elt 20:30 Š 2:22 2:22 2 Tes 2:3-10; Ell 13 \* 2:23  
2:23 Jon 5:23; 14:1 † 2:27 2:27 Jon 16:13

<sup>28</sup> Abon ebame, saan ano a ne, eji e l'jol esahb esahb efung bi á bahke feere ba. Nong, wahr k'feere njahm efung bio ana ane ba bo ma riki bo ndon.

<sup>29</sup> Eji m ma kahn re, Kraist li go etingitingi, nobo re wahn tob kahn re, nne awohng awohng no l'jo lim etingitingi, á li mmon Esowo.

### 3

#### *Abon Esowo*

<sup>1</sup> Nyehnen egburu elkoro ni e kp'koro Esowo, eji bo kp-r lungu re abon ba Esowo. E lohko li ano go etingitingi. Ejum ji wahnge njini nyia kil-r elkahne li re, bo ka kahn Esowo.\*

<sup>2</sup> Akpondahme enyame, anv, wahr ebjol abon Esowo. Ka tiki lennge ana e bahke jolo. E kp'kahne re, Kraist l'ba, e bahke yaange, jol ana ye. Tibre e bahk-e nyehne ana á li no.†

<sup>3</sup> Nne awohng awohng no ekunukpu eje li goji Kraist, á kpo bum elne saang, ana yefono Kraist li saang.

<sup>4</sup> Nne awohng awohng no ma lim abiafem, yebrange ntahm nyi Esowo. Tibre abiafem li ejum ji kpo range ntahm nyi Esowo.

<sup>5</sup> N kp'kahne re, Kraist ba re á ba sol abiafem enyahre tahm a nya. Abiafem anyehng anyehng go ege atahng wobem.

<sup>6</sup> Nne awohng awohng no l'jol a Kraist, á nehm kpe jo lim abiafem. Nne awohng awohng no l'jo lim abiafem, á ka nyehn Kraist, jol we á ka kahn.

---

\* 3:1 3:1 Jon 16:3 † 3:2 3:2 Kol 3:4

<sup>7</sup> Abon ebame, kana taame re, nne awohng awohng nehm-n. Nne no l'jo lim etingitingi, á li etingitingi nne, jang jang ana yefono Kraist li etingitingi nne.

<sup>8</sup> Nne no l'jo lim abiafem, á li ka nnehm, tibre nnehm bomo abiafem alimi go mboma mbomo. Ejum ji wahng ka Mmon no Esowo ba no, á ba re á ba ranngeltum ni nnehm.

<sup>9</sup> Nne awohng awohng no Esowo jel-e no limm, no kpo kpe lim abiafem. Tibre yefono Esowo antahng bia a ne. Á nehm kpe ma sa go abiafem, tibre Esowo bi jel-e no.

<sup>10</sup> Ana wo nne bahke ma liingi nne no li mmon Esowo, fere liingi nne no li mmon a nnehm. Nne awohng awohng no mmonannyehn tohk-e kor, k'fere lim ji li go etingitingi, ye mmon Esowo sang.

### *Belen elgoro atemtem*

<sup>11</sup> Tibre etib bi ana, bi í wuku go mbomannahb, bi bungu re, wahr tiki bel elgoro atemtem,

<sup>12</sup> wahr k'jol ana Ken ji jolo ka Ebinne, fere wul mmonannyehn. Jen ji wahng á kehm-e wulu? Tibre nsol nyi á jo lim, joom nob. Nsol nyi mmonannyehn jo lim nyi nyi jo nob.

<sup>13</sup> Abonanee, kiin jo kpo esi re njini nyia kp-n koko ekv.‡

<sup>14</sup> E kp'kahne re, wahr ebsehng go elkv rehng go elkpín, tibre abonanee kpo kor-r kor. Nne no ki kpi elgoro, á kpeke li go elkv.

<sup>15</sup> Nne awohng awohng no l'ko mmonannyehn ekv, á li nwulane. Í kp'kahne re, nwulane

---

‡ 3:13 3:13 Jon 15:18; Mat 5:11

awohng awohng limm, no kpi elkpín ni li go njinanjini go ege atahng.§

<sup>16</sup> Ana wo wahnge e ma kahn ana elkoro li no, tib eji Kraist yake elkpín ene ka, tib go egahre esi. Owo tob fuumu re, wahr tob yake elkpín enahre ka go esi ji abonane ejahre.\*

<sup>17</sup> L'jol re nne ebfang afang nya njini nyia, á l'nyehn mmonannyehn ejum m-e lehng, á l'lahm re, we á nehm ka, á bahke ma bung renan re, elkoro ni Esowo nia, wob-e go ege atahng?†

<sup>18</sup> Abon ebame, nong, wahr k'bel elkoro go alum nnyo nya nya, wahr belen etingitingi elkoro ni kpo lohko lim etingitingi.

*Esahb go esamahr bi Esowo*

<sup>19</sup> Ana wo e kp'kahne re, e li ka etingitingi jio. Ana wo e bahke goomo ntim enyahre, yiimi go esamahr bi Esowo.

<sup>20</sup> Ngare anyehng anyehng nyi ntim enyahre l'ka-r ebi, owo e bahke kahne re, Esowo gbale sehng ntim enyahre, á kp'kahne ejum ajehng ajehng.

<sup>21</sup> Akpondahme enyame, ntim enyahre tohk-r ka ebi, e kpi esahb go esamahr bi Esowo.‡

<sup>22</sup> E kpo bel ejum ajehng ajehng ji e l'bahb-e, tibre e kp'bumu alum enye, fere jo lim ji kp-e koro.§

<sup>23</sup> Atahm enye nya a, nya li re, wahr taame tv Jisos Kraist Mmon ewe, fere bel elkoro atemtem, ana á tong-r no.\*

---

§ 3:15 3:15 Mat 5:22 \* 3:16 3:16 Jon 3:16; 15:13 † 3:17 3:17

Jems 2:15-16 ‡ 3:21 3:21 Rom 5:1-2 § 3:22 3:22 Jon 15:7

\* 3:23 3:23 Jon 6:29

24 Ane kpee ba kp'bumu atahm enye, bo wob-e go eltim, ye tob wob go bo a ntim. Ana wo e kp'kahne re Esowo wob-r go egahra ntim, tib á ma-r ka etohko eje.†

## 4

### *Etingi Etohko, a nkimfahnge etohko*

1 Akpondahme enyame, kana jo taame tv etohko ajehng ajehng! Jo wuungen atohko, wahn jo seb kahn, joare bo lohng goji Esowo.\* Tibre akimfahnge abanyehnamahr gbalee eblohng kp'yannge go njini nyia.

2 Ana wo m bahke kehm kahne, joare etohko jio ji Esowo ji. Etohko ajehng ajehng ji l'yiimi ntianse re Jisos Kraist ba, ba ko ngubjing nyia nyi nne, etohko ana jio ji lohng goji Esowo.

3 Etohko ajehng ajehng ji tohko fere yiimi ntianse ka Jisos, lohngem goji Esowo. Etohko jio, Nnekv a Kraist wo, ye jio ji m ma wuk re á kp'bake. Tibre etohko jio ebsi b'ba anv a.†

4 Abon ebame, wahn li ka Esowo. Wahn eb-sehng akimfahnge abanyehnamahr bao. Tibre etohko jio ji wob-n go egahne atahng kpi nsahm sehng etohko jio ji li go njini.

5 Abanyehnamahr bao li ka njini, owo wahng alum nya bo kpo bung li nya njini. Owo fvfo, njini kpo wuungu bo atung.‡

6 Wahr li ka Esowo. Nne awohng awohng no l'kahn Esowo kpo wuung-r atung. Nne no ki li ka Esowo, wahr á kpehme wuungu atung.§ Ana

---

† 3:24 3:24 Rom 8:9 \* 4:1 4:1 1 Kor 14:29; 1 Tes 5:21 † 4:3 4:3  
1 Jon 2:18,22 ‡ 4:5 4:5 Jon 15:19 § 4:6 4:6 Jon 8:47

wo wahr bahke kahne Etingi Etohko, fere kahn etohko ji kpo kiimi afahnge.

*Esowo elkoro ni*

<sup>7</sup> Akpondahme enyame, nong wahr bel elkoro atemtem, tibre elkoro lohng goji Esowo. Nne no l'bel elkoro, Esowo bi jel-e no. Á kp'kahne Esowo.

<sup>8</sup> Nne no ki kpi elkoro, Esowo á nyimm. Tibre Esowo elkoro ni.

<sup>9</sup> Ana wo Esowo tib-r elkoro ene, eji á tumu mmon mmon awohng ewe tv go njini nyia, eji á l'ba ka-r elkpín.\*

<sup>10</sup> Ana wo elkoro li no. Lohngem re wahr ba, Esowo kor-r no. Wahr ba koro na Esowo, owo á kehm tumu mmon ewe, ba kpo go egahre esi, eji á l'gong-e tib go egahre abiafem.

<sup>11</sup> Akpondahme enyame, Esowo, wahr l'kor-e ano, nobo re wahr tob bel elkoro atemtem.†

<sup>12</sup> Nnene limm, no ma ny'nyehn Esowo. E l'bel elkoro atemtem, Esowo wob-r go egahra ntim, fere lim elkoro ene gbal go egahre ntim, fere jol go nseenge.

<sup>13</sup> Ana wo e kp'kahne re, wahr wob-e go ege atahng, á tob wob-r go atahng, tibre á ma-r ka etohko eje.

<sup>14</sup> Wahr ebnyehn, fere yiimi ntianse re, Esowo Nsoo tumu mmon ewe re, á ba jol nt'tahre no njini.

<sup>15</sup> Nne awohng awohng no l'yiimi ntianse re, Jisos Mmon Esowo wo, Esowo wob-e go ege atahng, á tob wob Esowo go atahng.

---

\* 4:9 4:9 Jon 3:16 † 4:11 4:11 Mat 18:33

<sup>16</sup> Owo fvfo, e kp'kahne, fere taame tv elkoro ni wahr koro Esowo. Esowo elkoro ni. Nne no l'bel elkoro, á wob Esowo go atahng, Esowo tob wob-e go atahng.

<sup>17</sup> E tohko fahl, e l'yiimi go esamahr bi Esowo efung elam bi kp'bake, lohngo re, elkoro enahre ebgbal kpee, biingi go nseenga nseenge. Tibre ana Kraist li no, ano wo fvfo e bahke tob jol go njini nyia.

<sup>18</sup> Elkoro, elfahle anehng anehng kpimm. Etin-gitingi elkoro ni nno a nno kpo kam efahlfahl yake go. Tibre elfahle kpo jen a erem. Nne no kpo fahl, elkoro ene ka gbal, biingi go nseenge.‡

<sup>19</sup> E kpi elkoro, tibre Esowo, wahr ba gbo mbang kor-e.

<sup>20</sup> Nne awohng awohng no l'tong re, “Esowo kp-m koro!” fere jo ko mmonannyeahn ekv, ye nkimfahnga nne wo. Eji mmonannyeahn no á kp-e nyehne kil-e elkoro, Esowo bahk-e koro renan, ye ji á kal-e ny'nyeh?

<sup>21</sup> Ntahm nyi ana, nyi Kraist ka-r no, nyi bungu re, Nne no Esowo l'kor-e, nobo re mmonannyeahn tob kor-e.§

## 5

### *Nne awo bahke ma ga njini nya?*

<sup>1</sup> Nne awohng awohng no l'taame re, Jisos wo li Kraist, ye mmon Esowo wo. Nne awohng awohng no nde l'kor-e, mmon ewe bahk-e tob kor.

<sup>2</sup> Esowo l'kor-r, e l'bum atahm enye, ana wo e bahke kahne re, abon Esowo kp-r koro.

---

‡ 4:18 4:18 Rom 8:33-39 § 4:21 4:21 Mak 12:29-31

<sup>3</sup> E l'bum atahm enye, jia lohngo re, á kp-r koro.\* Atahm enye riidem.†

<sup>4</sup> Nne awohng awohng no Esowo jel-e no, á kp'gake njini nyia. Eltaame enyahre ni e kp'taame ni wahnge e kp'gake njini nyia.

<sup>5</sup> Nne awo bahke ma ga njini nyia? Nnene limm, sehngem nne no kp'taame re, Jisos wo li Mmon Esowo, ye wo bahke ma ga njini.

### *Ntianse nyi Jisos Kraist*

<sup>6</sup> Jisos Kraist wo li nne no ko alahb, a alung ba a ma. Á koom alahb ma ma ba a ma. Á ko alahb ba a ma, a alung.‡ Etingi Etohko ji li ntianse, tibre Etingi Etohko, etingitingi ji.

<sup>7</sup> Li ntianse era,

<sup>8</sup> Etingi Etohko,§ a alahb,\* go alung.† Bo kpee ebtaame bum nnyo amehng.

<sup>9</sup> E kpo taame tv alum ntianse nya nne kpo bung. Esowo l'yiimi ntianse, ntianse nyio nyi bahke ga tahne, nyi á yiimi ka Mmon ewe.

<sup>10</sup> Nne no l'taame tv Mmon ewe, á kpi ntianse nyio go ege eltim.‡ Nne no tohko taame tv Esowo, yebrod Esowo bum ana nkimfahnga nne. Tibre á taamem tv ntianse nyi Esowo yiimi no ka Mmon ewe.

<sup>11</sup> A wo li ntianse nyi li re, Esowo ma-r ka elkpín ni li go njinanjini. Elkpín nio ni li goji Mmon ewe.

<sup>12</sup> Nne no l'ko Mmon, á kpi elkpín. Nne no tohko ko Mmon no Esowo, elkpín á kpimm.

### *Elkpín ni li go njinanjini*

---

\* 5:3 5:3 Jon 14:15    † 5:3 5:3 Mat 11:30    ‡ 5:6 5:6 Jon 19:34

§ 5:8 5:8 Mat 3:16    \* 5:8 5:8 Mat 3:14-15    † 5:8 5:8 Ef 1:7

‡ 5:10 5:10 Rom 8:16

<sup>13</sup> N kp'nyono nwer nyia tv wahn ji ma taame tv mbing nyi Mmon no Esowo, eji á l'kahn re, á kpi elkpin ni li go njinanjini.

<sup>14</sup> Ana wo e kpo sahb Esowo, tibre e l'bahb ajehng ajehng ji kor-e no, á kpo wuk-r wuk.§

<sup>15</sup> E l'kahn re, ajehng ajehng ji e l'bahb-e, á kpo w'wuk, e kp'tob kahn fvfo re, e bahke bele ajehng ajehng ji e l'bahb-e.

<sup>16</sup> Nne awohng awohng no l'nyehn mmonan-nyehn ma lim abiafem nya ki li nya elkv, nobo re á kak ero ka Esowo. Esowo bahke fere ka-e elkpin. Jia li ka ane bao ba ki lim abiafem nya elkv. Abiafem nyandiki nya elkv nya. Me, wahn n tongem re, wahn kak ero ka Esowo bade elkohn abiafem nyao.

<sup>17</sup> Eb'bi ajehng ajehng, abiafem nya. Elkohn abiafem nyandiki nyaa, nya ki li nya elkv.\*

<sup>18</sup> E kp'kahne re, nne awohng awohng no Esowo jel-e no kpehme lim abiafem. Nne no Esowo jel-e no, Jisos wo kpo baab-e. Ebinne jio we nehm ma lim ejumjum.†

<sup>19</sup> Wahr kp'kahne re, wahr li ka Esowo. Njini nyia kpee wob go elwo ni Ebinne jio.‡

<sup>20</sup> Wahr kp'kahne re, Mmon Esowo ebba, ba ka-r elkahne, eji e l'kahn Esowo bio bi li go etingitingi. E wob nne nno no li go etingitingi go atahng, a Jisos Kraist Mmon ewe. Ye wo li etingitingi Esowo, a elkpin ni li go njinanjini.§

<sup>21</sup> Abon ebame, yaamen a eblom!

---

§ 5:14 5:14 Jon 15:7 \* 5:17 5:17 Mat 12:32; Hib 6:4-6 † 5:18 5:18 Jon 10:28-29 ‡ 5:19 5:19 Luk 4:6 § 5:20 5:20 Jon 20:28; Rom 9:5

## **Ekajuk Scriptures Bible Portions**

### **Ekajuk: Ekajuk Scriptures Bible Portions (Bible)**

copyright © 2024 Luke Initiative for Scripture Translation and The Seed Company

Language: Ekajuk

Contributor: Luke Initiative for Scripture Translation

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

- You include the above copyright and source information.

- If you make any changes to the text, you must indicate that you did so in a way that makes it clear that the original licensor is not necessarily endorsing your changes.

- If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-02

---

PDF generated using Haiola and XeLaTeX on 1 Jul 2025 from source files dated 2 Jul 2025

fac6af8a-bed4-59a3-a152-52e0061121a4